


續
碑
傳
集



續碑傳集卷五十七

江陰繆荃孫纂錄

忠節四

浙江巡撫贈右都御史羅壯節神道碑銘

弘受祺

咸豐十年二月粵賊由皖南狂竄入浙二十八日省城陷巡撫羅公殉焉先是賊據金陵

天子命重臣圍之賊復四出大江南北並設將帥而浙江重兵悉寄於皖南羅公至知會城空虛則亟調湖湘各軍來援未至而皖兵已敗距公之至未三月也事聞

詔從優議卹會有撫浮言聞公者得

旨寢前命

今上卽位東南蕩平巨憝授首相國曾侯奏浙事之敗非公之過且陳公平日厯官廉正狀奉

詔如前議卹

贈右都御史銜

賜祭葬

予謚壯節中外臣民咸歎

朝廷之寢忠無已而公之學問節概終能不泯於沒世也公諱遵殿字澹邨安徽宿松縣人曾祖某祖某父某俱以公貴

封資政大夫母某氏

封夫人公生時夜忽光明如晝故小字有光幼孤篤學嗜宋五子書心究而力行之其學以不欺爲本以大節爲體以窮理致知爲用世俗浮好絕無所動其心也舉道光十一年鄉試十五年成進士以知縣發直隸署南樂補唐山治行稱最調清苑擢冀州遷浙江湖州府公爲治以強恕親民以析理綜劇湖州漕弊甲於浙省公輒親詣開誠曉喻莫不化梗爲良以與民習故得用其機牙禽劇盜百餘大府異之卓薦調杭州未數月擢湖北安襄鄖荆道襄俗素稱狡悍公治以鎮靜兩權臬司制府裕公薦治行第一咸豐二年粵寇蔓延兩湖檄公籌餉事襄匪郭大安乘公出將糾黨應粵逆爲亂公聞亟返親至賊所諭散其徒數千百人郭逆跪迎曉以禍福計稍緩會大兵至禽首逆事遂定公知民尙可用乃選其豪得勁卒數旅而編各鄉保甲爲團楚之團練自此始五歲中湖北省城三陷他郡粵賊蹂踐殆漏卒未一犯襄境六年擢兩淮

鹽運使大府奏留會省城克復遣撤川勇西歸有黠者誘襄匪爲亂蔓延荆鄖宜昌公以五百人偕城民守陣召集各團練從官軍剿匪閱八月而悉平七年擢湖北按察使次年擢湖北布政使時楚事再造巡撫胡公銳意圖治尤倚重公胡公統兵在外公在內用人行政如聲響之合湖北號稱大治九年擢福建巡撫奏對稱

旨調無浙江公稔浙江以徽甯各軍爲屏藩尤以江南大營爲根本會賊勢日盛公以大營恃浙餉爲食則專壹理財去其侵蝕者又逆知皖軍不可恃而湖湘援軍不得卽至城守兵甫二千又皆不能戰浙民素脆弱不得如襄陽之率以登城輒拊几太息深惜事之不可爲而一死之不足塞責也未幾賊薄城公悉力守禦又七日賊穴地實硝燄火發裂城數十丈賊入公被刀還署仰藥未死與配徐夫人暨長女適陳者環縊而絕公年六十有三洪惟我

朝敦尚樸學儒術大昌若李文貞湯文正誦法聖賢遭時隆盛或罹兵革卽返亨衢能專以學行表見於後至由外吏漸躋臺寄則有如于清端張清恪本德行爲政事身名並安垂光方來若公之以循吏始以偉烈終爲前此所僅有乃知爲學之貴乎躬行躬行之極於忠孝以之取

人則正士起以之涉世則大節完理有各足義無所偏要非空譚學術之可比附者也公服官數十年首嚴義利之辨無纖芥取於屬吏守湖州時烏程某令以治漕闕萬金公爲揭債昇之某令旋歿公徐以廉俸償之絕不介意家止茅屋十數楹其喪歸幾無以爲葬胡公集同人賻之得營壙焉與人交壹以誠相示不欲面斥人過能示意使人自悟所拔才以節操爲重如多山金雲門李棟皆殉

王事浙之趙景賢捍守孤城死事尤烈其他亦多循吏其所否者後雖名位顯赫卒自顯其詐諼云當杭城之未陷也與夫人訣曰予必與城存亡子盍自爲計夫人作色曰作君家婦四十年尙不我知邪適陳女早寡跪請從死從子婦周暨僕婦二人僕二人皆隨殉側室懷氏有子三人長忠祐候選員外郎善讀書能繼家次忠忠祥皆穎慧異人受祺識公自襄陽在楚宦迹輒相隨每聆公言反覆曲盡事理語畢卽默坐僚案中言不及政者輒弗聽聽亦不置一語因就公以心性相切礪則大悅締深交并以少女歸弱子忠祐以公狀請銘其曷敢辭銘曰大經垂天宏義懸日槃園孟方其理則一文質遞嬗乃分儒術原厥要歸若鍾有律惟公守學在濂雒閒孰馴非暴孰革非頑昔之治杭化梟

爲鸞比閭靜晏謠俗改觀公今再來寇從外軼如絲已棼如沐未櫛昔
之治襄婦子一家傾身赴險瘡不敢譁今之撫浙垣藩已徹引距失牙
欲奮無翼謂予不信公豈無武熊羆千億選材部伍厥將感誠亦委塵
土窮黎環泣公豈無慈午夜披章危迫陳辭及終不守視死如飴比城
已隳內郭可寄公如就之六日援至乃視藐躬固等浮雲但夷寸土願
熨元纁志士順義豈期稱後誼感關門同此稟受公昔登第出倭相門
旌德之呂通州之孫會稽有陶四傑並論倭素績學互發其源迨後四
公位各通顯臨難授命如驂隨輦是知爲學貴得其本時遇其通人益
己損狂挽桂流靡從草偃時當違塞盡瘁弗遑論飆拯溺崑炎遏光苟
其勿濟枕席鏤湯求仁得仁夫又奚傷俎粢孔修樵蘇永護金石弗渝
千載旦莫我銘斯阡庶迓來祚

又浙江巡撫羅公傳

方宗誠

公名遵殿字有光號澹邨宿松人少孤天性孝友有兄賈遷於外歲暮
母憐之公卽奔馳百餘里偕度歲除道光辛未舉於鄉乙未成進士以
知縣分發直隸署南樂肥鄉補唐山調清苑皆有治績擢知冀州未受
篆擢浙江湖州府時海氛甫熄湖屬漕務棘手公日詣倉市開誠布公

愷切宣諭事卒以辦又捐建書院於歸安以正士習捕獲巨寇百餘名數月湖州治凡四載移守杭州未數月擢湖北安襄鄖荆道襄陽古重鎮爲南北要害習俗強悍好鬪是時海內無事人不知兵公見世事日非憂危時形於色無何粵匪起流毒東南撫循士民簡練武備以故武昌三陷漢陽四失而襄境獨不被兵其後恢復武漢亦以此爲之基也咸豐六年擢兩淮鹽運使巡撫胡文忠公以武漢未復乞於朝留之是歲大饑冬閒散遣川豫皖南之卒黠者遂煽土匪作亂蔓延荆襄鄖宜四府公率五百人固守旬餘以待援軍次年五月平之七年春擢湖北按察使八年遷布政使時楚境肅清皖豫多警文忠常率師東征駐行閒籌度軍儲整飭吏事多倚公以辦九年夏奉命撫閩入

覲文忠疏請代撫鄂滇帥乞往滇黔皆不允

召對六次備蒙

溫旨陞辭後中途奉撫浙之

命九年十月履任自粵賊踞金陵浙省供給甯國一軍藉以堵禦門戶前巡撫胡興仁不願餉鄰省又與甯鎮將鄭魁士不和劾之易以他將

魁士武人闇大體然善戰守得士卒心實遏賊不得入浙魁士去而賊時有窺浙心公至見吏治軍事頽墮深以爲憂嚴舉劾察營伍籌畫布置昕夕焦勞匪懈然將吏泄沓久病公所爲多毀之十年春賊由甯國境竄入浙杭州城大兵單飛章乞援皆不至二月二十七日賊以地雷裂城三十餘丈城遂陷方賊之始至也公知城不可守集家人諭之曰吾與城存亡義也汝等其各自爲謀妻徐氏憤然曰作君家婦四十餘年尚不我知邪愧未能助君殺賊耳何用生爲次女陳穎秀之妻及族子宗傑妻周氏皆故孀居亦感泣誓同死自是日夜登陴守禦城陷俱仰藥未發復同趨西院自經以殉公清節過人兵事非其所習又適承前人頽墮之後受事未及三月狂寇突來於是浙人皆咎公事聞上以公素有官聲實心任事旣

優卹矣而御史高延祐奏請收回成命其後節相曾公白其冤得

賜卹典如初公自守令至巡撫不名一錢俸所餘卽以助族人未嘗購半畝之田徐夫人亦儉素恆著布衣殉節後家屬幾無以爲生子二人

長忠祐候選員外郎次某

羅壯節公別傳

李元度

公羅氏諱遵殿字澹村宿松人生八歲而孤篤志力學道光十五年進士以知縣發直隸權肥鄉南樂雄縣事補唐山調清苑擢冀州知州遷湖州知府調杭州擢安襄鄖荆道調湖南鹽法道大府疏留權湖北按察布政二司使遷兩淮鹽運使大府再疏留遂除湖北按察使晉布政使擢福建巡撫調浙江此公歷官階級也公在清苑卓薦引見

宣宗皇帝有本色書生之論

賞加同知銜在湖州襄陽各薦治行第一以克復安陸及京山

賞戴孔雀翎明年加按察使銜及撫閩湖北巡撫胡文忠林翼舉公自代雲貴總督張公亮基疏請調公撫黔

文宗皇帝皆弗許

陛見

召對六次公具陳民困及軍事得失

上霽顏納之歸途調撫浙江尋死寇難

文宗溫旨賜卹

予諡忠愍江督曾文正國藩及胡文忠會疏上公妻徐氏孀女陳羅氏族孀姪婦周氏同時殉難狀請

旨旌表並請於浙江宿松各建公專祠以其妻女姪婦配食同殉之雇婦金梅氏家丁顧斌均附祀

詔曰可亡何御史高延祐摭浮議劾公有

旨罷卹典其殉難妻女應得旌表仍照例辦理明年曾文正訟公清忠大節

穆宗皇帝特諭仍遵

文宗初次

諭旨照巡撫例從優賜卹其妻女姪婦及雇婦家丁一併旌卹乃贈公右都御史銜

予諡壯節

賜祭葬

賞騎都尉世職入祀京師昭忠祠暨本籍府城昭忠祠旣而浙撫請建專祠於杭州皖撫請建專祠於宿松湖北督撫疏請祀公名宦並得旨允行此公歷承

恩眷及死事

卹典也公爲治務約己而厚於民去南樂任民建生祠祀之守湖州值

漕政抗弊民抗納大吏將威以兵公單騎往諭悉解散輸賦如期爰建書院於南高橋以正士習烏程馬令以治漕故須假萬金集事公稱貸速其成亡何馬令物故公節衣縮食代償之初不屑意也涖湖四載禽劇盜百餘郡大治在襄陽行保伍法簡壯丁置左右有劫斂者捕治之增置義學十餘所益鹿門書院餐錢會粵寇起公手定章程檄所屬一律治團練楚北團練自公始咸豐二年賊陷武昌土匪郭大安糾黨行劫謀應賊公獲大安誅之殲其黨三百餘人三年權按察使躬歷蘄黃下游勘水陸形勢擇地駐兵扼賊會捻匪窺襄樊公回襄督治團防建礮臺十餘浚城濠數千丈治戰艦數十艘賊知有備不敢至明年武昌再陷皖賊陷德安安陸荊門諸州郡公帥五千人出屯王家河石灰窯歐家廟等處搃賊衝尋克復安陸京山二城八月曾文正克武昌賊遁明年春武昌復陷賊卒不敢躡襄境六年大旱饑僞翼王石達開上犯楚大震時方罷遣川豫勇過襄煽亂土匪高二先鹽梟馮二典應之大掠襄樊公帥民兵乘城守援兵至夾擊大破之禽二先賊平方事之殷姦民劉朝義等爭響應號八大頭目公密檄鄉團縛斬之是年大兵克武漢全楚肅清公以盜賊多起飢寒勸置社倉七十餘所立法擇人司

之瀕行猶以稅餘飭修老龍隄捍水患洎任兩司選良吏蠲漕費表節
義侍東征糗糧時胡文忠進規皖豫養兵勇六萬月餉四十萬緡公力
籌濟無闕乏用人不拘資格嘗曰用例一刀筆吏耳況今有事時乎會
文忠銜恤歸公代行巡撫事仍兼署提刑庶政畢舉李忠武續賓師覆
三河各軍議退保楚臺公持不可令扼宿松太湖而檄李勇毅續宜一
軍駐蘄水英山相犄角大局以振未幾文忠起復帥師屯黃州用人行
政倚公如右臂當是時楚北吏治軍政甲天下蓋公力爲多其撫浙也
以浙中吏習奔競痛除積習舉劾十餘人又以浙兵向不足恃資皖南
兵爲屏蔽驕不受節制乃疏請以張文毅芾總防務荃孫謹案張文毅
公督徽浙系何桂
清康熙時所奏請已懸
吳端書胡興仁兩撫矣其地漕捐輸別遣官督理又乞師胡文忠曾文
正請選將徵兵爲自強計部署未定而難作此公慤官治蹟也公學以
不欺爲本好宋五子書及名臣言行錄儒先語錄嘗手寫其要爲一冊
曰正學指歸在官嚴義利之界屬吏莫敢以筐篚進所至革州縣供張
服食如寒素嘗言世治亂視吏貪廉吏貪廉視身奢儉欲反亂爲治非
廉儉無以立節以此自勵亦時以此勉人所識拔人才必先操守氣節
若端愍公多山李剛介掬金果毅雲門其最也在吳興識趙忠節景賢

後卒以勳烈顯入

覲時有權貴人枋政置吏不造謁輒中傷之公不往遇諸朝一揖而退尤好扶植善類於君子小人進退消長每有見聞其憂樂必深至在官不爲子弟營仕進第令讀有用書近正人而已此公生平學行也僞忠王李秀成之閒道犯浙也在咸豐十年二月或勸公出營城外疏請以將軍守城公叱之曰是棄城出走計也吾受

國恩重肯苟活爲萬世羞十九日賊薄城公與將軍忠壯公瑞昌調民團及駐防二三千人使分堞守杭城周四十里兵少力不支適陰雨連旬公日夜行泥淖中撫慰疲卒守陣者皆泣數乞援軍不至公知事不可爲諭家人各爲計徐夫人忼慨言曰君死妾何忍獨生爲君家婦四十年尚不我知邪長女適陳穎秀早寡歸侍父母嘗刲股療母疾至是踰且泣曰未亡人忍死八年以父母在耳今願相從地下公族子忠傑婦周氏嫠而貧公挈之任所亦誓從公夫婦死先是公生時夜忽光明如晝因小字有光是月二十五日夜有大星隕節署前之鳳凰山公指且歎曰事可知矣二十七日賊穴地實火藥轟清波門城裂二十餘丈賊入公被刃傷額墜馬親卒掖回署中途仰藥至則夫人及女皆先仰

藥未卽死同趨署之西院聯纒就縊賊至周氏及雇婦金梅氏家僮順
斌皆死焉公年六十有三時將軍瑞忠壯固守駐防城越大日江南兵
至賊遁杭州復將軍入撫署見公貌如生公女猶兩手抱持母僵立六
日不仆此公死事及闔門殉節狀也烏虜公之死烈矣而其尤關天下
安危者則在備兵襄陽力固上游厥功爲尤偉何者荆襄天下根本而
襄尤當南北之衝全楚必爭地賊陷武漢時儻急趨荆襄乘虛擣中原
擾畿輔事有不可知者其走吳會直爲子女玉帛計識者知其無能爲
也然荆襄非宿重兵爲之備禍仍不知所底惟公首以團練法部勒襄
民使不從賊且殺賊同時官文恭以荊州將軍遷總督厲兵上游得建
瓴之勢公與同心戮力前後十年雖武昌三陷漢陽四失擒匪復時伺
隙而公所轄三郡一州汔不被兵其後胡文忠官文恭再造鄂疆率以
荆襄爲根本此尤功在天下尚論者或未盡知歟公舉會試與會稽陶
文節恩培通州孫文介銘恩旌德呂文節賢基同出長白文端公倭仁
之門時稱倭門四節公子三忠祜襲騎都尉湖北候補知府加三品銜

忠誨忠訓

贊曰元度生未識公辱公疏調先以書有知己之雅聞浙警方臥病山

中急募援軍戒塗噩耗至已無及矣悲夫喪歸宿松胡文忠曾文正偕
今相國合肥李公湘陰左公往弔哭元度從造其廬土室十數閒耳爲
外吏三十年田止四十畝家屬至無以自存卽一端已足不朽況一門
以內臣死職婦死夫女死父母僕死主固宜與星月爭光也哉公事在
國史文士例不當爲達官立傳然攷太平御覽引漢唐別傳至百一十
家故援茲例以應忠祐之請云

清故兵部侍郎兼都察院右副都御史江蘇巡撫徐公行狀

戴望

曾祖士標貢生

誥贈奉政大夫

贈資政大夫妣戴氏

誥贈

宜人

贈夫人

祖文心增廣生

贈中憲大夫

誥贈資政大夫妣閔氏柴氏

贈恭人

誥贈夫人

父聚奎邑庠生

敕贈承德郎

誥贈資政大夫妣閔氏

敕贈安

人

誥贈夫人繼妣張氏

敕封太安人

誥封太夫人

公諱有壬字鈞卿徐氏其先有澤鴻者唐懿宗時官兵部尚書居浙東
蕭山二十七世祖雍夏始遷湖州盛林鎮累傳至資政公生子六人公
其叔也公生而敦敏八歲解句股術初就傳勤讀不倦嘗覽族譜得米

太學生贈祕閣修撰應鑣闕門死節事歎曰吾它日當如此聞者駭之
資政公早卒太安人命公依叔父儀部公居京師凡十六年師事刑部
郎中姚君學煥欽天監博士陳君杰年二十二占宛平籍補博士弟子
員道光八年舉順天鄉試九年成進士榜發江都汪君喜孫夜走三十
里告王文簡爲科舉得人慶

廷試三甲以上事用分籤戶部補四川司主事二十年升山西司員外
郎充則例館提調隨和碩鄭親王尚書賽尚阿公往福建天津察辦事
案二十二年轉陝西司郎中京察一等記名以御史用二十三年授四
川成縣龍茂兵備道歷充四川文武鄉試外監試官二十七年署四川
按察使時囑匪滋事公誅其渠魁倡亂者而貸其餘二十八年擢兩廣
鹽運使署廣東按察使廣東俗惡犯大辟者率以貨鬻人代死曰頂凶
甘自誣伏斷脰不悔公素知之每鞠獄肫肫然與囚對語使自覺悟開
釋數十百人是年冬授四川按察使假道歸省以太安人年高將乞終
養太安人不許馳至京師值

成皇帝升遐
今上御極公扶服闕門面求叩謁

梓宮蒙

召見垂問經過各省情形歷陳所自

陛辭赴任由陝而蜀蜀人聞公至喜曰賢使者也是年應

詔求直言密上封事旋擢雲南布政使雲南運銅經費軍興以後他省無復津貼京銅不起運廠丁坐困謀作亂公請大府就廠制錢以蘇民困亂始息咸豐元年以曾孫生大吏奏五世同堂

御書篤慶延齡匾額以賜

賞銀緞有加三年調湖南布政使於是賊氛大熾烽火達湖湘公與督撫謀使鄉大夫各力輸餉子弟皆登陣守賊旣陷武昌湖北巡撫遁至湖南賊尾而至公下教關吏不聽入賊攻長沙四旬不克退走五年夏丁太安人憂歸里六年甯國告警浙之大吏奏請命公理湖州防務公見城惡亟出財修葺又疏通南湖濬城濠飭長興縣竟與廣德建平毘連爲最衝至是與太湖諸鎮皆爲守禦備賊犯高資公帥民兵往援甯國告陷又移書提督鄧紹良責堅守廣德毋縱賊入八年春二月服闋引見

上命公往江南理糧餉